

खबरां

- प्रधानमंत्री नरेंद्र मोदी होरें कर्नाटक दे आदिचुंचागिरी मठ च श्री गुरु भैरवैक्य मंदर दा उद्घाटन कीता, नागरिकें थमां विकसित भारत गी वास्तविकता बनाने लेई 9 प्राथमिकताएं आहले क्षेत्रें दे प्रति अपने आप गी समर्पित करने दा आग्रह कीता।
- सम्राट चौधरी होरें बिहार दे पैहले बीजेपी मुख्मंत्रि दे रूपै च संगंध लैती, जेडीयू नेता विजय कुमार चौधरी ते बिजेन्द्र प्रसाद यादव होर उपमुख्मंत्रि दे रूपै च कार्यभार साम्भडन।
- उपराश्ट्रपति सी.पी राधाकृष्णन होरें आखेआ जे शासन दा सच्चा मकसद लोकें गी सशक्त बनाना ते एहू यकीनी करना ऐ जे कोई पिच्छे नेई छुडी जा।
- पच्छिम एशिया संकट दरान आई दी मुश्कल दे बावजूद सरकार नै पूरे देश चएलपीजी द 100 फीसद घरेलू आपूर्ति यकीनी कीती।
- पच्छिम बंगाल ते तमिलनाडू विधानसभाएं लेई प्रचार अभियान तेज होई गेआ ऐ कीजे शीर्ष नेता दौनें राज्यें च मतदाताएं धोडी पुज्जने दे अपने प्रयासें गी तेज करा'रदे ना।
- आई.पी.एल क्रिकेट च रायल चैलेंजर्स दा मुकाबला बैंगलुरु च लखनउ सुपर जायंट्स कन्नै होग।

<><><><><><>

PM-Karnatka

प्रधानमंत्री नरेंद्र मोदी होरें नागरिकें गी विकसित भारत दे सुखने गी साकार करने लेई विकास दे 9 खेत्तरें च पूरी निष्ठा ते योगदानदेने दा आह्वान कीता। कर्नाटक दे मानडेया कौल आदि चुंचनगिरी मठ च गुरु भैरवैक्य मंदर दे उद्घाटन दे मौके पर बोलदे होई प्रधानमंत्री होरें आखेआ जे समाज लेई अपना जीवन समर्थित करने आहले संतें ते ऋषियें दा इये नेया दृष्टिकोण हा। प्रधानमंत्री होरें नागरिकें गी जेडे 9 खेत्तरें च सहयोग करने दा आग्रह कीता। उंदे च जल संरक्षण ते प्रबंधन ते इक्क पेड़ मां के नाम कार्जक्रम तैहत वृक्षारोपण शामिल ऐ। प्रधानमंत्री होरें स्वदेशी उत्पादें ते उद्यमियें गी प्रोत्साहित करिये स्वदेशी आंदोलन गी बढ़ावा देने दा बी आह्वान कीता।

<><><><><><>

Bihar-New CM

भारती जनता पार्टी दे वरिष्ठ नेता सम्राट चौधरी होरें अज्ज बिहार दे नमें मुख्मंत्रि दे तौरा पर संगंध चुक्की। राज्यपाल लेफ्टिनेंट जनरल (रिटायर्ड) सैयद अता हसनैन होरें पटना दे लोकभवन च आयोजित इक कार्जक्रम च उनेंगी ओह्दे ते राजदारी दी संगंध चुकाई। चौधरी होर राज्य दे 24में मुख्मंत्रि बने ना। ओहू पैहले बिहार दे मुख्मंत्रि बनने आहले पैहले बीजेपी नेता ना। इस मौके पर जेडीयू दे सीनियर लीडर ते सराय रंजन थमां विधायक विजय कुमार चौधरी ते सुपौल थमां विधायक बिजेन्द्र प्रसाद यादव होरें बी मंत्री पद दी शपथ लैती। विजय कुमार ते बिजेन्द्र यादव दवें बतौर उपमुख्मंत्रि

अपनियां सेवां देडन। इस कार्यक्रम च जेडीयू दे राश्ट्री अध्यक्ष ते साबका मुख्मन्त्री नितिश कुमार, बीजेपी दे सीनियर लीडर जे.पी नड्डा ते बीजेपी दे राश्ट्री अध्यक्ष नितिन नवीन बी मजूद हे।

<><><><><><>

Prez. AIIMS Nagpur

राश्ट्रपति द्रोपदी मुर्मू होरें अज्ज आखेआ जे तकनीकी विकास थमां ग्रामीण ते शैहरी सोआस्थ सेवाएं च मजूद असमानताएं गी दूर कीता जाना लोड्चदा ऐ ते सबनें गी गुणवत्तापूर्ण सोआस्थ सेवां उपलब्ध कराई जानी लोड्चदियां। एम्स नागपुर जनेई संस्थान इस दिशा च प्रयास करा रदे ना। राश्ट्रपति मुर्मू अज्ज अखिल भारती आयुर्वेद विज्ञान संस्थान नागपुर दे दुए दीक्षांत समारोह गी संबोधित करा'रदियां हियां। पिछले 10 बरें च केंद्र सरकार आसेआ अवसंरचना गी बढ़ावा देने लेई पुट्टी गेदी गैं पर लो पांदे होई राश्ट्रपति होरें दस्सेआ जे 43 अशारिया 5 करोड़ आयुष्मान कार्ड वितरित कीते जाई चुके दे ना।

<><><><><><>

VP-Viksit Bharat

उपराश्ट्रपति सी.पी राधाकृष्णन होरें आखेआ जे शासन दा सच्चा मकसद जनता गी सशक्त बनाना ते एह यकीनी करना ऐ जे कोई बी पिच्छे नेई छुडी जा। नमीं दिल्ली च भारती लोक प्रशासन संस्थान दे 72में स्थापना दिवस पर अपने संबोधन च श्री राधाकृष्णन होरें इस गल्ला पर जोर भरेआ जे समाज दा कोई बी वर्ग देश दा कोई बी क्षेत्र विकास थमां वंचित नेई रौहना लोड्चदा।

<><><><><><>

Govt. West Asia Brief

पच्छिम एशिया संकट दरान आई दी मुश्कलें दे बावजूद सरकार नै पूरे देश च एलपीजी दी 100 फीसदी घरेलू आपूर्ति यकीनी कीती ऐ। अज्ज नमीं दिल्ली च होई दी बैठक च पेट्रोलियम ते कुदरती गैस मंत्रालय दी संयुक्त सचिव सुजाता शर्मा होरें दस्सेआ जे पूरे देश च एलपीजी दी घरेलू आपूर्ति सामान्य बनदी दी ऐ ते कुते बी आपूर्ति बाधित नेई होई ऐ। उनें जानकारी दिती जे एलपीजी सिलेंडरें दी आनलाइन बुकिंग 98 फीसद तोड़ी पुज्जी चुकी दी ऐ ते इंदे च 93 फीसद शा मती सिलेंडर ओटीपी आधारित प्रमाणीकरण राएं वितरित कीता जाई चुके दा ऐ।

<><><><><><>

Amarnath

अमरनाथें दी सलाना जात्तरा लेई नां लखाने दा सिलसिला अज्ज थमां शुरू होई गेआ ऐ ते अज्ज पैहले रोज गै देसै दे बक्ख-बक्ख हिस्सें च नामजद बैंकें च खरा-मता रश दिक्खने गी लब्बा। नां दर्ज कराने लेई लोक बैंकें च पुज्जा करदे न-पर कन्नै गै घर बेइयै आनलाइन बी यात्रा लेई नां लखाने दी सुविधा उपलब्ध ऐ। 57एं दिनें धोड़ी चलने आहली एह जात्तरा 3 जुलाई गी शुरू होग ते 28 अगस्त रक्खन पुन्नेया आहले रोज सम्पन्न होई जाहगा। पंजाब नेशनल बैंक गी यात्रा पंजीकरण लेई नोडल एजेंसी बनाया गेदा ऐ ते मुख्म भरै च 556 शाखाएं च पंजीकरण कराने दा कम्म शुरू होई गेदा ऐ।

<><><><><><>

BCCI-Prez. LG

भारती क्रिकेट कंट्रोल बोर्ड-बी.सी.सी.आई दे प्रधान मिथुन मन्हास होरें अज्ज जम्मू च लेफ्टिनेंट गवर्नर मनोज सिन्हा हुं'दे'नै मलाटी कीती। मन्नेआ जा'रदा ऐ जे बैठक दरान जम्मू-कश्मीर च क्रिकेट दे विकास ते इसी बढ्जवा देने कन्नै जुडे दे मामलें पर चर्चा कीती गई ऐ। एह्दे अलावा इब्बी दस्सेआ जा'रदा ऐ जे इस बैठक दे दरान खेड्डु ढांचे गी तगडा बनाने सने युवा ते नमें उभरा करदे क्रिकेट खड्डारिएं लेई मौकें दे विस्तार करने बारै बी गल्लबात कीती गई ऐ।

<><><><><><>

Haj-Flights

जम्मू-कश्मीर दी हज कमेटी नै ऐलान कीता ऐ जे इस ब'रे दी हज जात्तरा लेई श्रीनगर थमां डोआरियां औंदी 18 अप्रैल थमां शुरू होडन। आकाशवाणी दे जम्मू संवाददाता दी रिपोर्ट मूजब पैहली त्रै डोआरियां उसै ध्याडे लेई तय ना। श्रद्धालुएं गी आखेआ गेआ ऐ जे ओहू उनेंगी दित्ते गेदे समें दे मताबक गै श्रीनगर दे बेमीना आले हज हाउस च रिपोर्ट करना। कमेटी नै सबनें श्रद्धालुएं गी गुजारश कीती ऐ जे ओहू ब्हाई अड्डे पर अपनी रवानगी आली प्रक्रिया गी बवस्थित बनाने लेई रिपोर्टिंग दे समें ते अपने समेयान मतल्लक दिशा-निर्देशें दी पालमा जकीनी बनान। ध्यानजोग ऐ जे जम्मू-कश्मीर थमां इस ब'रे कुल 4 ज्हार 704 श्रद्धालु हज जात्तरा लेई जा करदे ना।

<><><><><><>

WB-Campaigning

पच्छिम बंगाल च चुनां प्रचार च तेजी आई गई ऐ। बीजेपी दे वरिष्ठ नेता ते केंद्री गृह मंत्री अमित शाह होरें अज्ज दार्जिलिंग दे लाबोंग मैदान च मालदा थमां पार्टी मेदवारें दे समर्थन च इक जनसभा गी वर्चुअल ढंगै राएं संबोधित कीतां उनें जनसभा गी संबोधित करदे होई आश्वासन दित्ता जे बंगाल च गोरखा मुद्दे दा समाधान संवैधानिक ढांचे दे अंदर कीता जाह्ग ते बीजेपी दे सत्ता च आने दे बाद गोरखा समुदाय दे लोकें दे खलाफ दज्र झूठे मामलें वापस लैते जांगन।

<><><><><><>

TN-Polling

तमिलनाडू च इस म्हीने दी 23 तरीक गी होने आहले इक्कले चरण दे मतदान दी तैयारियां जोरें-शोरें जारी ना। प्रधानमंत्री होर अज्ज नागर कोइल च रोड शो करंगन। मोदी हुं'दे कन्नै AIADMK दे महासचिव Edappadi पलानी सामी ते बीजेपी दे वरिष्ठ नेता ते केंद्री मंत्री पीयूष गोयल होर बी होंगन। साबका वित्त मंत्री पी चिदंबरम होरें अज्ज संसद दे विशेष सत्र लेई बीजेपी गी जिम्मेदार ठहराया। डीएमके दे युवा विंग दे नेता ते उपमुख्यमंत्री उदयनिधि स्टालिन ओहापिडारम च चुनां प्रचार करारदे ना।

<><><><><><>

India Opposes UNSC

भारत नै संयुक्त राष्ट्र सुरक्षा परिषद च सुधार लेई स्थाई सदस्यता दी दो स्तरीय प्रणाली बनाने दा कडा बरोध कीता। संयुक्त राष्ट्र सुरक्षा परिषद सुधारें पर अंतर सरकारी वार्ता च बोलदे होई भारत दे

स्थाई प्रतिनिधि राजदूत पी. हरिश होरें आखेआ जे सार्थक सुधारें लेई स्थाई सदस्यता ते वीटो शक्तियें दा विस्तार करना जरूरी ऐ। उनें आखेआ जे वर्तमान संरचना हुन मजूदा वैश्विक वास्तविकताएं गी नेई दर्शादा। हालांकि भारत नै जी-4 देशें दे इक्क समझौता प्रस्ताव दा समर्थन कीता, जिस च सुझा दित्ता गेदा हा जे व्यापक सुधारें दे हिस्से दे रूप च नमें स्थाई सदस्य समीक्षा दे अधीन 15 बरे लेई वीटो शक्तियें दे उपयोग गी स्थागित करी सकदे ना।

<><><><><><>

IMD-Weather

मौसम विभाग नै मध्य महाराष्ट्र, कर्नाटक दे समुंद्रै बक्खी दूर-दरेडे इलाकें, रायसीमा ते तेलंगाना दे किश हिस्सें च कल्लै तगर लूह चलने दा सिलसिला जारी रौहने दी पेशनगोई कीती ऐ। मैहकमे दा आखना ऐ कि अगले दो त्रै दिनें तगर आंध्र प्रदेश, कर्नाटक दे समुंद्री इलाकें, पच्छिम बंगाल दे गंगा नदी कन्नै लगदे मदानी इलाकें, गुजरात, केरल, माहे, कोंकण, गोवा, ओडिशा, तमिलनाडू, पुदुचेरी ते कराईकल च मौसम गर्म ते गुम्मे आहले बने रौहने दे असार दस्से ना। तोआई, अरुणाचल प्रदेश दे ज्यादातर हिस्सें च अज्ज बरखा बरै करदी ऐ जिसलै जे कल्लै लेई कर्नाटक, पच्छिम बंगाल, जम्मू-कश्मीर, लद्दाख ते पूर्वोत्तर भारत दे केई राज्यें च बहल गडकने ते शमानी बिजली पौने दी बी शेंका दस्सी गेदी ऐ।

<><><><><><>

Weather

मौसम विभाग दा आखेना ऐ जे जम्मू-कश्मीर च अज्ज ते कल मौसम आमतौर पर खुशक बने दा रौहगा। ऊआं कल संजा'लै किश थाहरें पर हौली बरखा ते गरज-चमक दी मेद बी दस्सी गई ऐ। एहदे परैन्त 17 ते 18 अप्रैल गी केई थाहरें पर हौली बरखा ते गरज-चमक कन्नै बरखा बरने- अंधी-झक्खड़ झुलने ते किश थाहरें पर ऐन पौने दी बी भविक्खवाणी कीती गई ऐ।

<><><><><><>

IPL

आई.पी.एल क्रिकेट च अज्ज हुनै कोला किश चिर मगरा रायल चैलेंजर्स बैंगलुरु दा मकाबला लखनऊ सुपर किंग्स कन्नै होगा। ... दी टीम नै टॉस जित्तियै पैहले .. करने दा फैसला लैता ऐ। मैच ठीक साड्डे 7 बजे शुरू होगा। तोआई, कल रातीं चेन्नई दे एम.ए चिदंबरम स्टेडियम च खेड्डे गेदे इक मैच च चेन्नई सुपर किंग्स नै कोलकाता नाइट राइडर्स गी 32 रन कन्नै हराया हा।

<><><><><><>